

fuerit cclxxii millium armorum lectissimorum teste Orofio: vel ut Cæsar ipse prodidit cccclxxi. Belgio ergo jam olim nobiles, ut ex Cæsare didicimus. Idem Cæsar ii Commen. Solos esse ait qui patrum memoria omni Gallia vexata Teutones Cimbrosque intra fines suos ingredi prohibuissent: eaque re factum, uti rerum istarum memoria magnam sibi auctoritatem, magnosque spiritus in re militari sumerent. Experti id etiam nostro seculo tot peregrini exercitus, qui tanquam tirones cum veteranis congressi, in civibus, rusticis, nautis, ferociam, & vim veteranorum deprehenderunt. Belgii xvii sunt Provinciæ, quas Carolus v Imperator omnes possedit: in quibus sunt Ducatus iv, *Brabantia, Limburgi*, qui cum Comitatu Dalem & Dominiis Valckenburg ac Rodele Duc, Brabantia annexus est, & a Iustitia, & Cancellaria Brabantia dependet: *Lutzenburgi & Geldria*. Comitatus vii, *Flandria, Artesia, Hammonia, Hollandia, Zelandia, Namurci & Zutphania*: Marchionatus Sacri Imperii, qui i v Civitates principales habuit, *Nivellam, Lovanium, Bruxellam & Metropolim Antverpiam*, nunc Brabantia pars est: Dominia v, *Frisia Occidentalis, Mechlinia, Ultrajecti, Trans-Isalania & Gruninga*. Urbes habet Belgium plurimas, easque munitissimas, quarum numerum, ut

*Urbium nomina*

& Opidorum & Pagorum apud Mercatorem habes. Inter urbes autem maxime excellunt, *Lovanium, Bruxella, Antverpia, Silva-Ducis, Gandavum, Bruga, Hipra, Mechlinia, Cameracum, Atrebatum, Tornacum, Mons, Valencena, Insula, Durdrechtum, Harlemum, Amstelodamum, Lugdunum Batavorum, Namurcum, Neomagus, Trajectum, & alia*. Lacuum, stagnorum & paludum maximus in Belgio numerus, quæ præter Pisces quos magno numero suppeditant: Regionem istas adversus hostium impetus muniunt. Flumina in hac

*Lacus.*

*Flumina.*

Regione perpaucæ oriuntur, sed alibi orta maxima non pauca scindunt eam beantque plurimum. Præcipua sunt, *Rhenus, Mosa, Scaldis, Amis*: Minora *Mosella, Lisa, Aa, Sambra, Dela* & alia permulta. De Rheno & Amisi dicemus in Germania. De Mosella diximus in Lotaringia. Reliqua hic describamus. *Mosa* profluit ex Monte Vogeso, qui est in finibus Lingonum, haud longe ab Araris Matronæque fontibus: & in Septentrionem procurrens *S. Theobaldi Fanum* (*S. Tibaut*) radit, ubi navigabilis esse incipit: inde Viridunum perlabitur: ab eo in Cæciam vergens, Mosonem & Maferiacum pergit. Inde ad Septentrionem se convertens Carolomontem, Boviniacum, Dinantum & Namurcum lustrat: ibique *Sabi* auctus & tumidus ad ventum Græcum se flestit, atque Hoyum contemplatus, & Leodium, Trajectum perlapsus, ac Stochemum, Ruremundam & Venloium præterlegit: ubi ad Occidentem conversus Cuickam, Graviam, Raveftienum & Megenam adluens: post apud Herwerdum pagum recepta Rheni, traditaque vicissim sui parte, cum Vahali commiscetur: & continuo servatis nominibus suis iterum disjunguntur, & separatim Loveftienum labuntur: ubi Insulam Bomelianam includunt, ac rursus confluentes junguntur, & pristino amisso Merova nomen accipiunt: atque ita Worcomium & Gorcomium præterlapsi, maximo sinu Durdrechtum perveniunt, ibique facta Insula Ilesmonda, Mosa proprium nomen recipit, idemque retinens Roterodamum & Vlaerdingam, præterlapsus nobili ostio circa Brielam Oceanum tam violenter ingreditur, ut longo spatio cursum retinens aquam suam dulcem conservet, idque maximo cum fructu. Præter alios enim pisces viam aperit Acipenseribus,